




陝西通叙

淺草文庫

陝西者周公分陝其地在西也關中者秦以函關為東門隴關為西門而地在二關之中也禹貢雍州之域天文井鬼分野說文四面積高曰雍言有河山之固如物處井陰氣壅闕也惟漢中屬梁州周合梁于雍故漢都關中無置涼州部刺史察舉隴西北地等郡而不常所治矣唐開元中置京畿等四道採訪處置使而京畿道治京城關內道亦以京官領之隴西道治西平山南西道治漢中宋初置陝西路後因元昊寇邊增置永興鄜延環慶



陝西通叙

陝西各府志 卷之二
秦鳳涇原熙河六路經畧安撫司並以守臣兼焉
元置行中書省治安西肅政廉訪司治鳳翔又分
置陝西漢中河西隴北四道至正末天下大亂羅
山人李思齊與察罕帖木兒者同奮義起兵尋乃
自相攻殺元主詔潼關以西屬李思齊以東屬擴
廓帖木兒于是思齊遣部將張意等益拔武功岐
隴之地悉有關中我 明洪武二年三月大兵至
潼關克之師齊遂降平定關中因置陝西等處承
宣布政使司及提刑按察都指揮使司並治省城
而關內道轄西安一府關南道轄漢中一府關西

道轄鳳翔平涼二府隴右道轄臨洮鞏昌二府河
西道轄延安慶陽二府又有商洛潼關榆林寧夏
甘肅西寧等道則各以其所駐地方而名 國初
封建之時自長安 秦愍王榭而下又有 韓府
在平涼 慶府在寧夏 肅府在蘭州藩屏西土
實磐石之宗也○秦府第在西安府之左府治在
省城近西譙樓直其南秦簡王誠詠記曰予間閱
始祖愍王起居注內載一事洪武十三年九月初
一日長興侯耿炳文左長史文原吉右長史湯誠
之偕陝西布政司左布政王廉西安府知府王宗

周於東殿啓知起建鼓樓是日微雨噫自始建逮今蓋百十餘年矣攷之長興侯耿炳文當時蓋爲王相而左右長史則其叅佐也文原吉未知終何官湯誠之後改吉安知府王廉會稽人所謂交出先生者有文名不知所終而王宗周者亦無從可攷噫諸君子皆百餘年人物而此樓乃巋然獨存予每過其下不容不爲之太息云按志稱王從幼喜讀書吟詠時接賓客話談竟日不倦有賓竹槁行于世賓竹亭名在邸內西南隅

陝西名勝志卷之一

閩中曹學佺能始撰

西安府

附省

領州六縣三十三

漢長安郡之名以古有長安鄉在渭水南卽成蟾之所封也我明西安府之名以漢有西安亭在鼎路門卽北對未央宮者也或云元爲安西路國朝顛倒其名用之○禹貢雍州已詳上文及周文武豐鎬所都平王東遷始以岐鄠之地賜秦至秦孝公徙都咸陽始皇并天下置內史以領關中漢高入關定三秦卽帝位仍舊置內史景帝分左

右焉武帝太初元年改左內史爲京兆尹左馮翊
右內史爲右扶風謂之三輔其理俱在長安城中
又置司隸校尉以總之光武都洛陽以關中地置
雍州迄晉唐宋雍州之名不改而司隸三輔已省
惟京兆郡則時置焉十六國劉聰石勒苻健姚萇
之徒相繼僭竊赫赫連勃勃號爲南臺唐天寶歲始
曰西京後魏孝武自洛陽徙都長安隋文帝則自
長安徙都洛陽更置不一按西漢書高帝五年婁
敬說曰陛下都洛陽豈欲與周室比隆哉周之都
洛以爲此天下中四方納貢職道里均有德則易

以王無德則易以亡凡居此者欲令務以德致人
不欲阻險令後世驕奢也今陛下欲比隆成康之
時爲不侔矣且夫秦地被山帶河四塞以爲固卒
然有急百萬之衆可具因秦之故資甚美膏腴之
地是之謂天府陛下入關而都之山東雖亂秦故
地可全而有也此所謂扼天下之吭而拊其背也
高帝問羣臣羣臣皆山東人爭言周王數百年秦
二世則亡不如都周高祖疑未能決及留侯明言
入關便卽日駕西都關中六年擒韓信田肯賀高
祖曰甚善陛下得韓信又治秦中秦形勝之國帶

陝西各縣志 卷之二
河阻山持戟百萬秦得百一焉地勢便利以其下
兵於諸侯譬猶居高屋之上建瓴水也風俗傳云
秦有四塞之固漢高納劉敬之言都之因徙齊諸
田楚昭屈景燕趙韓魏之後豪族名家于關中強
本弱末以制天下自是每因諸帝山陵則遷戶立
縣率以爲常故五方錯雜風俗不一漢朝京輔稱
爲難理○漢左內史兒寬勸課農桑卑體下士吏
民大信愛之○黃霸字次公自潁川太守徵拜京
兆尹以循良稱及其爲相功名損于治郡云○韓
延壽爲左馮翊民有昆弟訟田者延壽因閉閣思

過由是郡中轉相飭勵恩信周遍于屬縣○趙廣
漢守京兆尹善爲鈎距以得事情發姦摘伏如神
明白廣漢後更數尹皆不稱惟張敞能繼其跡敞
性喜風流每郡事之暇入閤中爲其內子畫着其
後有王尊王章王駿亦俱有能名故京師稱曰前
有趙張後有三王也○後漢李燮拜京兆尹民謠
曰我府君道教舉愛如母訓如父蓋耑任德化云
○唐因話錄劉林州棲楚爲京兆號令嚴明人不
敢犯先是京城惡少屠沽商販多繫名諸軍不遵
府縣法劉公皆窮治之甚至有匿軍人名目自稱

百姓者當時人人似頭上各有劉尹不敢爲非然
公與屬吏言未嘗傷氣不叱責一官人嘗謂府縣
寮曰諸公各自了本分公事晴天美景任意遊賞
勿致拘束其又豁達如此○韓愈爲京兆尹六軍
肅然私相謂曰是尚欲燒佛骨何可犯耶○宋大
中祥符七年蜀人陳堯咨以龍圖閣直學士尚書
工部郎中知永興府事以城內井泉大半鹹苦民
不堪食乃親相度城東二里之龍首渠其水清冷
其冽可五六十丈開渠引注入城散流屢開民飲
咸足事聞下敕嘉美之 國朝天順元年西安知

府余子俊以宋渠湮塞乃相城外西南有交澗二
水源流不竭而地勢高下因之導引灌注城市其
水清甘蠲疾資生皆取給焉按交澗二水俱自終
南山流出也

長安縣 附郭

史記秦始皇弟成蟜封長安君將兵擊趙者秦亡
楚懷王封項羽漢高帝封盧縮俱爲長安侯漢定
天下始爲縣屬京兆尹王莽曰常安矣潘岳關中
記云長安城皆黑壤赤城今尚赤如火堅如石父
老傳云鑿龍首山土以爲之賈耽縣道記云長安

縣故城今謂之苑城漢京北府在故城內尚冠里
長安蓋古鄉聚名在渭水南隔渭水北對秦咸陽
宮漢于其地築未央宮謂大城曰長安城五年始
置○隋胡師耽詩結廬終南山西北望帝京煙霞
亂鳥道劣見長安城宮雉互相映雙闕雲間生朱
閣臨槐路紫蓋飛縱橫望望未極已甕牖秋風驚
○按已上稱長安俱屬故城至隋遷大興城內此
城遂廢

咸寧縣

附郭

咸寧之名唐天寶七年所命前後皆爲萬年縣也

萬年本漢縣屬左馬翊設在櫟陽城東北今臨潼
縣境三輔黃圖云漢太上皇葬櫟陽北原起萬年
陵因置萬年縣矣隋開皇三年遷都大興城因別
置萬年于城內與長安縣配並爲赤縣而櫟陽遂
廢至唐天寶始改今名○城闕記云萬年縣門樓
隋宇文愷造唐高宗末太平公主出降薛紹于此
縣納婚初以縣門隘窄議欲毀之高宗勅曰萬年
縣門屋宇文愷所造制作多奇勿得毀拆仍以別
地開之○據志云郡南六十里有石鼈谷蓋終南
山下太乙谷也以谷口有巨圓石如鼈故名長安

咸寧以此分界雍勝畧亦謂太乙山隸長安咸寧之間其下有谷谷內有太乙祠漢元封二年建唐岑參石鼈厓舊廬招王學士詩驟雨鳴淅瀝颼颼谿谷寒碧潭千餘尺下見蛟龍蟠石門吞衆流絕峯呀層巒幽趣倏萬變竒觀非一端抱版尋舊圃救廬臨迅湍釀酒漉松子引泉通竹竿何必濯滄浪不能釣嚴灘此地可遺老勸君來考槃○長安志云終南山在郡城西南五十里五經要義曰終南長安南山也詩云終南何有有條有枚毛註周之名山終南也皇甫謐高士傳云秦有東園公

夏黃公綺里季角里先生時呼四皓共入商洛隱地肺山以待天下定及秦敗漢高帝重其節四人乃深自匿終南山不能屈之潘岳關中記云終南一名中南言在天下之中居都之南也一名太乙張衡西京賦云終南太乙崇岷崔萃唐王維詩太乙近天都連山到海隅是終南太乙本一山也按元和間李吉甫撰郡國志核關中終南山所歷而著諸郡縣自鄠郿武功以至長安萬年每縣皆著終南山名言相望矣○程大昌雍錄曰龍首山在長安縣西北一十里長六十里首入渭水尾達樊

川秦時有黑龍從南山出飲渭水其行道因成土山漢張衡賦云疏龍首以抗殿註曰疏山爲臺殿不假板築高比長安城又龍首原在咸寧縣東卽其北行之勢垂坡東下以爲平原者也隋唐都城皆在此原上開皇初令開渠引澧水北流入苑謂之龍首渠按今由景龍池入城以注秦宮者是○漢武故事云武帝建元三年起上林苑吾丘壽王所奏東南至藍田宜春鼎湖御宿昆吾傍南山而西至長楊五柞北繞黃山濱渭而東漢舊儀云上林苑方三百里按其故基跨今盩厔鄠藍田咸寧

長安五縣之境續漢書百官志云上林苑令一人六百石王苑中禽獸而宮館之事屬水衡廣漢後有罪誅沒入爲官園鳥獸草木皆入上林苑中○司馬相如上林賦云蕩蕩乎八川謂灞澹涇渭豐鎬澇潏也世稱長安之地潏鎬經其前涇渭遠其後灞澹界其右豐澇合其右乃其大勢也○按志渭水北去城五十里發源鳥鼠山西自鄠縣界流入灞水出藍田山北流注之澹水與灞水同源至灞則合灞水又有長水出白鹿原亦流于灞漢封禪書云秦都咸陽灞澹長水皆非大川以近咸陽

盡得祠之卽此後因姚萇據有長安避其諱改名
荆溪故釋漚水者曰荆溪之下流也○說文曰漚
水出杜陵今名沈水自南山皇子陂西北流入渭
潦水出南山滂谷北流入于渭亦上林故地也涇
水源出安定東至陽陵與渭同流而清濁不混詩
云涇以渭雜湜湜其汜是矣○渭水又東豐水從
南來注之如淳曰去長安四十里源出長安縣秦
嶺北西北經子午谷又得豐谷口水故豐取名焉
文王遷豐依此水也詩曰豐水東注維禹之績箋
云昔堯時豐水汎濫爲害禹治之使入渭東注于

河禹之功也按子午谷在漢都城正南終南山下
有微徑從杜陵徑達漢中謂之子午道○鎬水源
出太白山西谷中合滴水以入渭三輔決錄曰鎬
在豐水東豐在鎬水西相去二十五里書傳文王
作鄆武王理鎬孔安國注云鎬水昆明池北鎬陂
是也○鎬京故基在府城南三十里詩曰考卜維
王宅是鎬京惟龜正之武王成之亦謂之宗周也
梁載言十道志云鎬池一名元阯秦始皇毀之又
云漢武帝穿昆明池于此地鎬京基構淪陷無可
窺矣○唐魏王泰括地志云鎬水今亦不入渭有

渭河西自長安入注于渭漢武帝元光六年所開
注水經曰城南漕渠有漢時靈臺北與未央宮對
有銅表題云太初四年造○水經云渭水又東逕
長安城北漢惠帝三年造六年始成之城十二門
東出北頭第一門本名宣平門潘岳西征賦踐宣
平之清闕庾子山云望宣平之貴里言貴戚所居
也王莽更名春王門正月亭亦曰東城門其郭門
亦曰東都門卽逢萌掛冠處矣第二門本名清明
門一曰凱門王莽更曰宣德門布恩亭內有籍田
倉亦曰籍田門第三門本名灞城門王莽更名仁

壽門無疆亭秦民見門色青又名青城門或曰青
綺門亦曰青門門外舊出佳瓜昔廣陵人邵平爲
秦東陵侯秦破爲布衣種瓜瓜美世謂之東陵瓜
是以阮籍詠懷詩曰昔聞東陵瓜近在青門外措
此門也南出東頭第一門本名覆盎門王莽更名
永清門長茂亭其南有下杜城應劭曰杜陵之下
聚落也故曰下杜門又曰端門北對長樂宮第二
門本名安門亦曰鼎路門王莽更名光禮門顯樂
亭卽西安亭北對未央宮第三門本名平門王莽
更名信平門城正亭西出南頭第一門本名章門

王莽更名萬秋門億年亭亦曰光畢門也又曰便門第二門本名直門王莽更名直道門端路亭故龍樓門也張晏曰門樓有銅龍三輔黃圖曰長安西出第二門卽此門也第三門本名西城門亦曰雍門王莽更名章義門著誼亭其水北有函里氏名曰函里門又曰光門亦曰突門北出西頭第一門本名橫門王莽更名霸都門左幽亭如淳曰音光故曰光門其外郭有都門有棘門徐廣曰棘門在渭北三輔黃圖曰棘門在橫門外漢書徐厲軍於此備匈奴又有通門亥門也其第二門本名洛

門又曰朝門王莽更名建子門廣世亭一曰高門蘓林曰高門長安城北門也一曰厨門其內有長安厨官在事故城曰厨門如淳曰今名廣門也第三門本名杜門亦曰利城門王莽更名進和門臨水亭其水有客舍故曰客舍門又曰洛門也凡此諸門皆通達九達三途洞開賈山至言曰秦爲馳道於天下東窮燕齊南極吳楚道廣五十步二丈而列樹厚築其外隱以金椎樹以青松者也左出右入爲往來之經行者升降有上下之別漢成帝爲太子元帝嘗急召之太子至龍樓門不敢絕馳

道西至直城門方乃得度上恠遲問其故以狀對上悅乃著令太子得絕馳道也渭水東合昆明故渠渠上承昆明池東口逕河地陂北亦曰女觀陂又東合沔水亦曰漕渠又東逕明堂南舊引水爲辟雍處在鼎路門東南七里其制上圓下方九宮十二室四嚮五色堂北三百步有靈臺漢平帝永始四年立渠南有漢園丘成帝建始二年罷雍五時始祀皇天上帝於長安南郊應劭曰天郊在長安南卽此也故渠之北有白亭博望苑漢武帝爲太子立使通賓客從所好也太子巫蠱事發砍杜

門東出史良娣死葬於苑北宣帝以爲戾園故渠又東而北屈逕青門外與沔水枝渠會渠上承沔水於章門西飛渠引水入城東爲倉池池在未央宮西池中有漸臺漢兵起王莽死于此臺又東逕未央宮北高祖在關東令蕭何成未央宮何斬龍首山而營之山長六十餘里頭高二十丈尾漸下高五六丈其北有玄武闕卽北闕也東有蒼龍闕闕內有閭闔公車諸門未央殿東有宣室玉堂麒麟含章白虎鳳凰朱雀鷓鴣昭陽諸殿天祿石渠麒麟二閣未央宮北卽桂宮也周十餘里內有明

光殿走狗臺柏梁臺舊乘複道用相逕通故張衡
西京賦曰鈎陳之外閣道穹窿屬長安與明光逕
北通于桂宮故渠出二宮之間謂之明渠也又東
歷武庫北舊樗里子葬於此樗里子名疾秦惠王
異母弟也滑稽多智秦人號曰智囊葬于昭王廟
西渭南陰鄉樗里故俗謂之樗里子云樗里子曰
我百歲後是有天子之宮夾我墓穴以昭王七年
葬至漢長樂宮在其東未央宮在其西武庫直其
墓秦人諺曰力則任鄙智則樗里也明渠又東逕
漢高祖長樂宮北宮周二十里殿前列銅人殿西

有長信長秋永壽永昌諸殿殿之東北有池池北
有層臺俗謂是池爲酒池非也故渠北有樓豎漢
京兆尹司馬文預碑故渠又東出城分爲二渠卽
漢書所謂王渠者也蘓林曰王宮家渠也猶今之
御溝矣在城東霸門外一水逕楊橋下卽青門橋
也水側城北逕鄧艾祠西而北注渭其一渠東逕
奉明縣之廣明苑南史皇孫及王夫人葬于郭北
宣帝遷苑南史王孫及王夫人十以爲悼園益園
民千六百家立奉明縣以奉二園園在東都門昌
邑王賀自灞上御法駕郎中令龔遂驂乘至廣明

東都門是也故渠東北逕漢太尉夏侯嬰冢西葬
日樞馬悲鳴輕車罔進下得石槨銘云于嗟滕公
居此室故遂葬焉冢在城東八里飲馬橋南四里
故時人謂之馬冢□渭水又東沈水注之水上承
皇子陂於樊川其地卽杜之樊鄉也漢祖至櫟陽
以將軍樊噲灌廢丘功最賜邑于此鄉矣沈水又
西北逕下杜城卽杜伯國也沈水又西北支合故
渠渠有二流上承交水合於高陽源而北逕河池
陂東北注沈水沈水又北與昆明故池會又北逕
秦通六基東又北逕竭水陂東又北得陂承其陂

東北流入于沈水沈水又北逕長安城西與昆明
池水合水上流承池於昆明臺故王仲都所居也
桓譚新論稱元帝被病廣求方士漢中送道士仲
都詔問所能對曰能忍寒暑乃以昆明池上環水
而馳御者衣裘寒戰而仲都獨無變色卧于池臺
曛然自若夏大暑日使曝坐環以十爐火亦不言
熱池水北逕鎬京東秦阿房宮西史記曰秦始皇
三十五年以咸陽之人多先王之宮小乃作朝宮
於渭南亦曰阿城也始皇先作前殿阿房上可坐
萬人下可建五丈旗周爲閣道自殿直抵城南山

表山巔爲闕爲複道自阿房度渭屬之咸陽象天極閣道絕漢抵營室也關中記曰阿房殿在長安西南二十里殿東西千步南北三百步庭中受十萬人其水又屈而逕北東北流注竭水陂陂水北出逕漢武帝建章宮東於鳳闕南東注沱水又北逕鳳闕東三輔黃圖曰建章宮漢武帝造周二十餘里千門萬戶其東鳳闕高七丈五尺俗言真女樓非也關中記曰建章宮圓闕臨北道有金鳳在闕上高丈餘故號鳳闕也沱水又北分爲二水一水東北流一水北逕神明臺東傅子宮室簿曰上

於建章宮中作神明臺并幹樓高五十餘丈皆作懸閣輦道相屬上有九室今人謂之九子臺沱水又逕漸臺東漢武故事曰建章宮北有太液池池中有漸臺高三十丈漸浸也爲池水所漸一說星名也南有璧門三層高三十餘丈中殿十二門階陛咸以玉爲之鑄銅鳳五丈飾以黃金屋上椽首薄以玉璧因曰璧玉門也沱水又北流注渭俗謂是水爲瀉水亦曰高都水前漢之末五侯王氏大治池沼引入長安城故百姓歌之曰五侯初起曲陽最怒壞决高都竟連五杜土山漸臺像西白虎

卽是水矣渭水又東過長安縣北渭水東分爲二
廣雅曰水自渭出爲滎其猶河之有雍也北瀆東
北流逕魏雍州刺史郭淮碑南又東南合一水逕
兩石人北秦始皇造橋鐵鑿重不勝故刺石擬力
士孟賁等像以祭之鑿乃可移動也又東逕陽侯
祠北水漲輒祀之此神能爲大波故配食河伯而
後人以爲鄧艾祠悲哉讒勝道消專忠受害矣渭
水又東注北水水上有梁謂之渭橋秦制也亦曰
便門橋橋廣六丈南北二百八十步六十八間七
百五十柱一百二十二梁橋南北有隄激立石柱

柱南京北立柱北馮翊立令丞各領徒千五百八
橋之北首壘石水中故謂之石柱橋也舊有村留
神像此神嘗與魯班語班令神出村留曰我貌猙
醜卿善圖物容班於是拱手與言曰出頭見我村
留乃出首班於是脚畫地村留覺之便還沒水
故置其像於水唯背以上立水上後董卓入關遂
焚此橋魏武帝更修之橋三丈六尺三秦記曰燕
太子丹質于秦秦王遇之無禮乃求歸秦王爲機
發之橋欲以陷丹丹過之橋不爲發又一說交龍
捧輦而機不發卽此處矣渭水又東與沈水枝津

合水上承沈水東北流逕鄧艾祠南又東分爲二水一水東入逍遙園注藕池池中有臺觀蓮荷被浦秀實可翫其一水北流于渭渭水又逕長安城北□霸水又左合澹水歷白鹿原東逕霸浹漢文帝葬其上謂之霸陵上有四出道以瀉水在長安東南三十里故王仲宣賦詩云南登灞陵岸迴首望長安文帝嘗欲從霸西馳下峻坂袁盎攬轡不動上曰將軍怯耶盎曰臣聞千金之子坐不垂堂百金之子立不倚衡聖人不乘危今馳不測如馬驚車敗柰高廟何上乃止昔文帝居灞陵北臨厠

指新豐路示慎夫人曰此走邯鄲道也因使慎夫人鼓瑟上自倚瑟而歌悽愴悲懷顧謂羣臣曰以北山石爲槲用紵絮散陳漆其間豈可動哉釋之曰使其中有可欲雖錮南山猶有隙使無可欲雖無石槲又何戚焉文帝曰善拜廷尉韋昭曰高岸夾水爲厠今斯原夾二水也霸水又北會兩川又北故源左出焉霸水又北逕芷陽宮南秦襄王所造謂之霸上漢高帝回軍以待項羽於斯處霸水又北逕王莽九廟南莽地皇元年博徵天下工匠壞撤西苑建章諸宮館十餘所取材凡以起九廟

竿及吏民以義入錢穀助成厥工殿皆重屋太初
祖廟東西南北各四十丈高十七丈餘廟半之爲
銅薄樞飾以金銀雕文極窮技巧禱高增下工費
數百巨萬卒死者萬數霸水又北逕枳道在長安
縣東十三里秦王子嬰出降沛公處高后世有白
鷺羣飛自東都門過于枳道五行志曰高后八年
三月被霸上還枳道見物如蒼狗檝高后掖忽不
見卜之趙王如意爲祟遂病掖傷而崩注云檝謂
狗持之也水上有橋謂之霸橋地皇二年霸橋木
災自東起卒數千以水汎沃救不滅晨熾夕燼王

莽惡之下書曰甲午火橋乙未立春之日也予以
神明三年終冬絕滅霸駁之橋欲以興成新室統
一長存之道其名灞爲長存橋霸水之北左納漕
渠絕灞左出焉東逕霸城北又東逕子楚陵北皇
甫謚曰秦莊王葬于芒蕩之麗山京兆東南霸陵
山劉向曰莊王大其名立墳者也戰國策曰莊王
字異人更名子楚故世人猶以子楚名陵口按志
秦莊襄王墓在故長安通化門東二里俗名尖塚
皇覽謂呂不韋塚○樗里子墓在故長安城內未
央宮東唐元和志曰未央長樂二宮相距一里程

大呂雍錄云以二宮垣墉之相抵而言也中央一里卽武庫地樗里子墓介于其間○蝦蟆陵在舊城南六里臙脂陂唐韋述西京記云本董仲舒墓李肇國史補曰昔漢武帝幸芙蓉園每至此墓下馬時人謂之下馬陵歲月深遠遂誤爲蝦蟆耳近興慶宮故基○周穆王陵在府城西南二十五里屬咸寧之張恭村○漢文帝霸陵在灊水之東白鹿原上因山爲墳其廟卽顧成廟遺址也薄太后葬附文帝陵東南謂之南霸陵○霸陵大道南有秦時銅人十二董卓壞以爲錢餘二枚尚存卽薊

子訓與老人摩挲銅狄處○灊上有亭亭有尉王之李廣屏居南山下射獵歸爲亭尉所問曰寧識故將軍耶○灊橋原跨水上西京送行者多至此折柳贈別故唐人語曰詩思在灊橋風雪中也至王莽時橋災隋乃更造以石唐取江淹別賦黯然銷魂之語因目爲銷魂橋右灊水今已徙去橋在平陸去城東二十有五里○灊南五里卽樂遊原本杜縣之東原一名鴻固原漢宣帝所樂遊築以爲陵曰杜陵因以樂遊原併置縣曰杜陵漢張仲蔚滿宅蓬蒿蔣詡開二徑惟與二仲往來俱在杜

陵內□杜陵東南十餘里又有一陵差小相傳許皇后附葬者漢書宣后葬杜陵南園師古注謂之少陵也今屬咸寧縣之司馬村□少陵之東卽杜曲近啓夏門長安志云唐李抱玉碑在杜曲村有墳□柳宗元墓碑韓退之文在少陵原之北相傳陵西卽杜子美舊宅祁國杜公佑竒章牛公僧孺之居皆在焉後杜牧卽祁公別墅增築之名樊水園與常曲相埒當時語曰城南常杜去天尺五言二家皆歷代顯宦云○常曲在府城南二十里自漢以來諸常居之至唐屬常安石別業極林泉花木之勝杜子美詩常曲花無賴家家惱殺人李白亦嘗遊此故張浮休水磨賦云叅以太白忘機脫屣者也□韓昌黎別墅在常曲東與孟郊賦詩及其子讀書之所名曰韓莊有鄭莊在其東南卽少陵集鄭十八虔之居也又其西有塔坡者何將軍之山林也其地有浮圖產稻極美土人謂之塔坡米云○樊川在城南三十里潏水所經也本名後寬川曰樊川者以樊噲食邑而名今其地有華嚴寺但謂之華嚴川云按宋曾改大年縣爲樊川縣至金始復咸寧○皇子陂在常曲之西陂周七里

木之勝杜子美詩常曲花無賴家家惱殺人李白亦嘗遊此故張浮休水磨賦云叅以太白忘機脫屣者也□韓昌黎別墅在常曲東與孟郊賦詩及其子讀書之所名曰韓莊有鄭莊在其東南卽少陵集鄭十八虔之居也又其西有塔坡者何將軍之山林也其地有浮圖產稻極美土人謂之塔坡米云○樊川在城南三十里潏水所經也本名後寬川曰樊川者以樊噲食邑而名今其地有華嚴寺但謂之華嚴川云按宋曾改大年縣爲樊川縣至金始復咸寧○皇子陂在常曲之西陂周七里

十道志云秦葬皇子起冢陂北原上因名杜甫詩
曰天寒皇子陂一本作黃子者譌○三輔黃圖云
渭水上有三橋曰中渭橋在城西北二十五里秦
始皇造始皇離宮夾渭南北因作此橋以通之故
曰渭水貫都以象天漢橫橋南渡以法牽牛也曰
東渭橋在城東北五十里漢高祖時造以通櫟陽
之道曰西渭橋在舊長安城西漢武帝造以通茂
陵卽名便橋者也○三輔故事又載橫橋漢承秦
制廣爲六丈南北長二百八十步置都水令以掌
之號爲石柱橋橋南屬京北北屬扶風此之橫橋

卽中橋也○漢都城北橫門外別有橫橋不在跨
渭之數三輔黃圖曰長安城下有池周繞廣三丈
深二丈石橋各六丈與街正等則橫橋乃其跨城
壕以爲之者非跨渭也○三輔故事云長安城中
有八街九陌漢京兆尹張敞走馬章臺街丞相劉
屈氂妻梟首華陽街陳湯斬郅支王懸首藁街三
輔黃圖有香室街夕陰街尚冠前街漢書又有太
常街熾盛街張衡西京賦云觀其城郭之制則旁
開三門參塗夷庭方軌十二街衢相經後秦時百
姓歌曰長安大街夾樹楊槐下走朱輪上有鸞栖

英彥雲集誨我萌黎○長安市凡九所各方一百六十六步六市在道西三市在道東四里爲一市凡九市致九州之人在突門夾橫橋大道又有當市樓以望遠道張衡西京賦云廓開九市通鬪帶闐旗亭五重俯察百隧者也○元和郡國志云長安大俠萬子夏居柳市太學諸生朔望集槐市司馬季主卜于東市其西市在醴泉坊隋曰利人市因立西市署又有二十四獄近西市傍○唐時有宮市貞元間吳湊爲京兆尹奏罷之民極稱便嘗于官街樹槐及瘞卒人民指樹而懷之○唐九耀

街有試官石在武安王廟前橫臥街側色黑而瑩長四五尺高二三尺舉人就試者以釘釘之卜其中否卽今石上有釘數十餘釘頭皆露亦有半入而上曲者皆如此類○長安志云秦阿房宮在縣西三十里殿東西五百步南北五十丈上可坐萬人宮前置銅人十二積十五年始成顏師古曰阿房者言殿之四阿皆爲房也又曰宮成而天下亂未暇擇令名但以阿房名之○長樂宮本秦興樂宮也在舊長安城東亦謂之東宮長安記云興樂宮秦始皇造漢脩飾之宮前銅人十二其背有銘李

斯撰蒙恬書漢紀高帝五年都長安九月治長樂
七年宮成諸侯皆朝宣帝元康四年神雀五采以
萬數集長樂宮五鳳二年鸞鳳集長樂宮東闕中
樹上三輔黃圖云長樂宮前殿東西四十九丈七
尺兩杼中二十五丈深十二丈漢太后常居之故
有長信長秋永寧諸殿在長樂宮之西長樂正殿
內有溫室卽人問孔光溫室樹何木光默然不應
處○未央宮在舊長安城內西南隅漢書高祖七
年蕭何起未央宮立東闕西闕前殿武庫太倉上
見其壯麗甚怒曰天下匈匈勞苦數歲成敗未可

知是何治宮室過度也何曰天下方未定故可因
以就宮室天子以四海爲家非壯麗無以重威且
令後世無以加也上悅乃從櫟陽徙居之○西京
雜記云未央宮周迴二十一里九十五步五尺街
道周迴七十里臺殿四十三其三十二在外其十
一在後宮池十三山六門闕凡九十五又曰昭陽
殿在未央宮中織珠爲簾風至則鳴如環珮聲窓
戶扇多是琉璃皆通照毛髮不得藏椽桷皆刻作
蛇龍縈繞其間鱗甲分明見者莫不驚慄○漢宮
殿疏曰未央宮有金馬門青瑣門朱鳥堂畫堂甲

觀非常室又有延年合權四車宣明昆德諸殿玉
堂增盤宣室天祿石渠諸閣宣室祕室也文帝受
釐之所卽召見賈生處石渠天祿俱在未央宮大
殿北石渠者鑿石爲渠中藏蕭何所得秦世圖籍
天祿異獸也揚雄校書于上又有鈎盾弄田鈎盾
宦寺名弄田者燕遊之田天子所戲弄也又有曲
臺天子射于此如淳曰行射禮于曲臺后倉爲之
記○桂宮漢武帝造漢書曰桂宮有紫房複道通
未央關中記云桂宮在未央宮北周迴十餘里中
有明光殿殿上有複道從宮中西上城西至建章

宮神明臺蓬山三秦記云未央宮明光殿皆金玉
珠璣爲簾箔處明月珠金祀玉階晝夜光明又云
桂宮一名甘泉宮作迎風臺以避暑西京雜記云
武帝爲七寶床雜寶案厠寶屏風列寶帳設於桂
宮時人謂之四寶宮漢書又曰北宮中有神君居
壽宮張羽旗設供具以禮神君神君來則肅然風
生帷帳皆動又有太子宫甲觀漢書曰孝成皇帝
母曰王皇后元帝在太子宫成帝生于甲觀畫堂
也按桂宮一名紫宮三秦記云未央宮卽紫宮李
善曰未央宮爲總稱紫宮其中別名耳○建章宮

漢書武帝太初元年作建章宮度爲千門萬戶前殿度高未央其東則鳳闕高二十餘丈其西則商中數十里虎圈其北治大池漸臺高二十餘丈名曰太液池中有蓬萊方丈瀛洲壺梁象海中神山龜魚之屬其南有玉堂璧門大鳥之屬立神明臺井幹樓高五十丈輦道相屬焉二輔舊事云建章宮周迴數里殿東別起鳳闕高二十五丈乘高以望遠又于宮門北起圓闕高二十五丈上有銅鳳凰赤眉賊壞之西京賦云圓闕聳以造天若雙碣之相望廟記云建章北闕門也有鳳凰闕高十七丈五尺俗人謂鳳凰闕爲貞女樓古歌辭云長安城西有雙闕上有雙銅雀一鳴五穀生再鳴五穀熟按銅雀卽銅鳳凰也故址在未央宮西南上林苑內顏師古曰上林苑中有宮十二建章其一也又西有葡萄宮漢書哀帝元壽二年單于來朝以太歲厭勝所在舍之因起此宮口按建章宮因柏梁災武帝以越巫勇之言而建柏梁臺剏自元鼎初年卽武帝宴羣臣作七言詩處世所謂柏梁體也臺以香柏爲之香聞數里云○太液池在建章宮北周迴十頃中有采菱越女鳴鶴之舟及趙飛

燕結裾避風之臺又有曝衣閣在池之西漢武故事云七月七日宮女出后衣曝于其上○曲江去咸寧縣南十里周六七里亦名芙蓉池本秦隄洲司馬相如賦曰臨曲江之隈洲顏師古云曲岸之洲曲江也漢武帝穿以爲宜春苑其水曲折有侶廣陵之江故名唐閻朝隱詩注以似嘉陵江矣韋述記云宣帝起樂遊苑於曲江池以爲校文之所唐開元中更疏鑿之池邊菰蒲葱翠柳陰四合都人遊賞中和節三月三日最盛玄宗嘗錫臣寮宴飲焉後以秀士每年登科第賜宴曲江蓋不忘校

文之義也○慈恩寺在曲江西杏園內唐進士賜宴後率題名于慈恩寺塔本隋無漏寺地唐初廢貞觀十二年高宗在青宮爲文德皇后請立寺故以慈恩爲名寺南臨黃渠竹樹森邃浮圖七層崇三百尺有辟支佛牙大如斗光采煥爛南部新書曰帝肇初及第偶于慈恩塔下題名後人慕效遂爲故事謂之雁塔題名此塔倣西域製名亦本之○昆明池在長安縣西南三十里地名鸛鵲莊漢書元符二年臧隴西北地上郡戍卒之半發謫使穿昆明池臣瓚曰西南夷傳有越雋昆明國有滇

池方二百里漢使求身毒國爲昆明所閉帝欲伐之故作昆明池以習水戰周迴四十里凡三百二十頃按括地志云豐鎬二水皆已堰入昆明池無復流派水經云交水西至石碣有石闔堰是也曰王子年拾遺記云武帝思懷李夫人不可得見始穿昆明之池泛翔禽之舟帝自造歌曲使女伶歌之時日已西傾涼風激水女伶歌聲甚適因賦落葉哀蟬之曲其詞曰羅袂兮無聲玉墀兮塵生虛房冷而寂寞落葉依于重扇望彼美之女兮安得感予心之未寧□西京雜記云昆明池有二石人

如牽牛織女有戈船樓船各數百艘樓船上建樓櫓戈船上建戈矛四角悉垂幡旄旌葆麾蓋照燭涯涘□漢武鑿昆明池極深悉是灰墨無復土以問東方朔朔曰臣愚不足以知之可試問西域胡人後漢明帝時有西域胡人來洛陽時有憶朔言者問之胡人曰天地大劫將盡則有劫燒此劫燒之餘灰也池中有豫章臺及石鯨每至雷雨魚常鳴吼鬣尾皆動代祭之以祈雨往往有驗□三秦記云昆明池有沼名神池舊傳堯時治水停船于此其地通白鹿原有人釣魚綸絕而去見夢武帝

求去其鈎明日戲于池見大魚銜鈎曰豈非昨所
夢乎去鈎放之間三日帝復遊池于池濱得明珠
一雙帝曰豈昔魚之報耶□三輔黃圖曰宣曲宮
在昆明池西漢宣帝曉音律嘗于此度曲因名□
杜佑通典云唐神龍中安樂公主恃寵請昆明池
中宗不與主怒自以家財別穿池號定昆池地去
長安縣西南十五里張說有三月三日宴定昆池
官莊詩□雁鴛陂地方六頃承昆明下流在鎬池
北沈約詩云東出千金堰西臨雁鴛陂□河池陂
亦承昆明而東注涇一名女觀陂□唐宋之間晦

日昆明池應制詩春豫靈池會滄波帳殿開舟凌
石鯨渡槎拂斗牛迴節晦莫全落春遲柳暗催象
溟看浴景燒劫辨沈灰鎬飲周王樂汾歌漢武才
不愁明月盡自有夜珠來按是夕則天后賜羣臣
宴卽席賦詩命上官昭容選其尤者一篇以製新
曲延清此詩爲第一○洞冥記云漢武帝於望鶴
臺西起俯月臺臺下穿影娥池每登臺眺月影入
池中使宮人乘舟咲弄月影因名影娥池唐上官
儀詠雪詩有珠散影娥池之句惟張柬之能解其
用事焉○拾遺記曰漢昭帝穿淋池引太液之水

陽西各縣志 卷之二
池 中植分菱荷一莖四葉狀如輶蓋花葉離萎芬
馥之氣徹十餘里宮人貴之每遊宴出入必皆含
嚼或剪以爲衣或折以蔽日以爲戲弄帝時命水
嬉以文梓爲船木蘭爲楫刻飛燕翔鷺于船首臨
風輕漾畢景忘歸乃使宮人歌曰秋素景兮汎洪
波揮纖手兮折菱荷涼風淒淒揚棹歌雲光開曙
月低河萬歲爲樂豈云多○漢博望苑武帝爲戾
太子置接賓客之所在金城坊戾園東南○漢思
后園漢武帝衛皇后之陵園也后字子夫其家號
曰衛氏出平陽侯邑子夫爲平陽主謳者武帝卽

位子夫入宮有寵生戾太子遂立爲皇后巫蠱事
起江充爲姦太子懼不能自明遂與后謀誅江充
發兵兵敗太子走后自殺宣帝卽位改葬置園邑
于此在金城坊卽故城杜門外大道東漢書戾太
子敗皇孫及妃王夫人皆遇害葬廣明蕪林注云
苑名也又曰史皇孫位在廣明郭北文穎注云位
塚位也宣帝卽位以爲悼園八年立奉明縣以奉
陵寢西征賦云北惟奉明也○太極殿戴延之西
征記云苻秦築宮于長安東城中有太極殿殿上
有金井按唐之西內正殿亦名太極殿本此又太

陝西名勝志 卷之一
極宮有四海池東南西北皆以爲名○望春宮隋文帝建煬帝改曰長樂宮在城東十里漣水西岸唐沈佺期詩東望望春春可憐本此○大明宮在城東北五里唐東內也貞觀中建初名永安後改曰蓬萊又改曰大明賈至有早朝大明宮詩王維岑參杜甫皆和之宮內有紫宸蓬萊含元麟德宣政諸殿殿前東西廊有日華月華二門日華門有鬱儀樓月華門有結璘樓其中則麟德殿也又含元殿西有光範門卽韓愈上書得伏光範門外者○學士院在蓬萊殿西李肇國史補曰學士院北廳前有花塼道冬中日及五磚爲入直之候李程性懶好晚入常過八磚始入○金鑾殿在宣政殿北玄宗于此召見李白論當世事奏頌一篇帝賜食親爲調羹詔供奉翰林至德宗時嘗移院于金鑾坡故世稱翰林學士爲坡云○興慶宮在城東南五里唐南內也玄宗建內有文泰南薰大同諸殿有沈香亭開元禁中初種木芍藥得四本上因移于沈香亭前一日與楊貴妃坐有所感欲製新曲因召李白白已醉賦清平調四首有解釋春風無限恨沈香亭北倚欄干之句○又有勤政務本

陝西名勝志 卷之一
樓花萼相輝樓俱開元時建帝與諸王同榻飲宴
及千秋節賜酺處也雍錄曰勤政樓在南花萼樓
在西俱隸興慶宮蓋玄宗西樓以讌兄弟南樓以
脩政事云○按興慶宮本玄宗舊宅在城東南角
隆慶坊玄宗卽位之後以宅爲宮因避諱改爲興
慶唐六典云宅內有井忽湧成小池常有黃龍出
其中名曰龍池唐諸臣有龍池應制篇卽此○廟
記云漢高帝廟在長安城西南原廟在渭水北惠
帝所造春薦櫻桃之始○文帝廟在金塢北大道
南一名顧成廟崔豹古今注曰顧成廟有玉鼎三
真金爐二槐樹悉爲扶老鉤闌畫雲龍角處于其
上應劭曰文帝廟謂之顧成廟者言其制度卑狹
若顧望而成也帝出顧成廟外無宿館竇太主因
獻長門園武帝以爲長門宮陳皇后妬被廢居之
司馬相如爲作賦如淳曰長門者因長水以爲名
也○景帝廟在德陽宮漢書曰德陽宮乃景帝廟
也帝自作之諱言故爲宮○武帝廟見茂陵下○
昭帝廟宣帝廟俱見二陵○孝元廟王莽壞之更
爲文母太后起廟留其正殿爲文安慕食堂後漢
書云光武徙都洛陽乃于長安合聚一廟于高廟

命太宰一人掌焉○漢書長安十二城各有侯蕭望之爲小東門侯者長安城距今城十三里自光化門向西趣北乃高帝七年脩本秦離宮也按惠帝元年正月城長安二年九月城成周六十五里十二門形如北斗故名北斗城一名陽甲城甲始也謂一陽初生期福祿于未艾云○大興城卽今城也按隋書開皇二年以長安故都年代旣久宮宇朽蠹謀欲遷都僕射蘓威太師李穆并太史令庾季才等議合于帝旨遂以其年六月十八日詔規建制至三年三月十八日移入新都其地卽漢故城之東南屬杜縣宇文周之京兆郡萬年縣界南直子午谷西北據渭水東臨漣灞西枕龍首原僕射高頴總領其事安平公宇文愷創制規模將作大匠劉龍鉅鹿郡公賀婁子幹等充使營建謂之大興城以帝始封大興公因以爲名或曰其地本大興村嘗有僧坐大木下曰此後當爲宮殿大木卽大興殿基址也是年隋始遷都改萬年爲大興縣唐因之永徽四年增築改名長安城○長安志云唐京城南面三門正中曰明德門北當皇城朱雀門南出抵終南山之境東曰啓夏門門外卽

杜曲也又西南有園丘先農籍田三壇西曰安化門東面三門最北曰通化門中曰春明門當門外有漢太傅蕭望之墓唐詩云春明門外卽天涯蓋送別多于是處南曰延興門同昌公主葬懿宗與郭淑妃御延興門哭送卽此處也西面三門北曰開遠門中曰全光門西出趣昆明池南曰延平門其北面一門曰光化門又有延秋門安祿山反時玄宗與貴妃皇子等以黎明出此門故杜甫詩云長安城頭頭白烏夜飛延秋門上呼○唐皇城俗名子城其東五門西二門南北十四街東西十一

街有朱雀門街乃前街也東西廣百步萬年長安二縣以此街爲界萬年領街東五十四坊及東市長安領街西五十四坊及西市有玄都觀在朱雀街西之安善坊蓋宇文愷之營隋都也曰朱雀街南北盡郭有六條坡象乾卦六爻故于九二爻置宮殿九三爻置百官諸司謂九五貴位不欲常人居之故剏玄都觀及興善寺于其地玄都觀卽劉禹錫看花賦詩處○唐舊制京城內金吾昏曉傳呼以戒行者馬周請置六街鼓號曰鑿鑿鼓唐時又有夾城蓋玄宗以隆慶坊爲興慶宮附外郭爲

複道自大明宮潛通此宮及曲江芙蓉園又十宅
皇子令中官押之于夾城起居西外郭廡後宣宗
于夾城南頭開便門自芙蓉園北入青龍寺俗號
新開門杜牧之詩六龍南幸芙蓉苑十里飄香入
夾城○新城唐天祐元年匡國節度使韓建築時
朱全忠遷昭宗于洛毀長安宮室百司及民廬舍
長安遂墟建去宮城外郭城重脩子城卽皇城也
南閉朱雀及延喜安福二門北開玄武門是爲新
城城之制內外二重四門門各三重今存者惟二
重內重基址尚在東西又有小城二以爲長安咸
寧縣治所此元時奉元路城圖所載○雍勝畧云
唐禁苑在今省城北東西二十七里南北三十二
里苑中有疑碧池安祿山亂賊徒張樂于此樂工
雷海清不勝憤擲樂器慟哭王維被禁菩提寺聞
之賦詩曰秋槐葉落深宮冷疑碧池頭奏管絃○
唐西內有三城外一重曰京城外郭城也南近樊
川北連禁中一重曰宮城惟列府寺不使雜人居
止又內一重是內宮城而太極宮在其內卽隋大
興宮今省城正直宮城之地所謂易卦六爻九二
位也東內大明宮在省城東北今含元殿故基高

四十餘尺去城三里殿前有翔鸞棲鳳閣基址尚存南內興慶宮故基去省城東三里卽隋大興京城東南角隆慶坊地後以避玄宗諱改曰興慶宮十四年取永騰利業二坊各半增廣之謂之南內置朝堂云○雍勝畧云造書臺在舊長安城之東宮張村三會寺內有臺卽倉頡造書處唐岑參詩野寺荒臺晚寒天古木悲空階有鳥跡猶似造書時○邵平瓜田在舊長安城東門外今長安縣之西北程大昌雍錄青門卽杜門也在漢都城爲東面南來第一門故邵平瓜謂之東陵瓜○大薦福寺本漢諫議蕭瑀宅隋煬帝在藩亦居之唐天授初改立爲寺神龍以後凡佛經皆于此翻譯寺有浮圖俗呼爲小雁塔李嶠諸人俱有大薦福寺應制詩按在今長安縣南五里古朱雀街東又里許卽大興善寺隋文帝所建段成式曰靖善坊大興善寺取大興兩字坊名一字爲名有天王閣太和二年移此高大爲宇內之最□長安志云興善寺有費長房碑文及不空和尚塔東廊素和尚手植紫桐四株○雍錄云香積寺近昆明池鎬水發源之處唐郭子儀傳云距豐水臨大川蓋寺在豐

水東交水西也子儀收西京陣于此蓋先時敗于
清渠至此循南山出都城據險以待之也然則寺
直子午谷正北而微西無疑○普光寺一名天池
寺寺上下有二上寺有天池及無壞尊者塔下寺
殿宇瓌麗爲一時之偉觀今不復存○興教寺在
華嚴川之西有玄奘法師葬塔上多唐人石刻又
西有牛頭寺在牛頭坡遍照禪師道場有姜泳書
碑杜甫詩青山意不盡滾滾上牛頭指此也○石
經在府學內 文廟之碑洞唐文宗時國子監鄭
覃以經籍刊謬詔與張次宗孔溫業等共力讐刊
準漢舊事鏤石太學九經并孝經論語爾雅共一
百五十九卷字樣四十卷開成二年告成初置在
務本坊宋元祐五年漕司呂公移置京兆學黎持
爲之記○孝經爲唐玄宗天寶四載隸書未有太
子亨右相林甫左相適之等題名○聖教序唐太
宗文有高宗後記及心經俱集王右軍書○夫子
廟堂碑唐武德九年虞世南奉勅撰并書首有相
王旦書額蓋此碑舊無額武后始增之耳是碑評
者謂與歐陽率更齊名而崇體過之今傳是五代
時翻刻○皇甫君碑唐于志寧撰歐陽詢書向稱

完好我萬曆二十四年亭圯壓碑斷裂□家廟碑
顏真卿撰書李陽水篆額其碑四面環轉丰稜秀
出後廟燬宋初有李延襲者語郡守移置于此□
多寶佛塔感應碑唐岑勳撰顏真卿書徐浩題額
□陰符經唐忠恕三體書尚全□草書千字文唐
釋懷素書又有張旭草書千文僅存五十餘行□
爭坐位帖顏真卿草書□馬公神道碑柳公權書
右前後碑刻凡二百二十餘座今舉其尤者餘不
悉錄□張羽王西遷注云孔廟東墀虞永興碑雖
斷裂有亭覆西卽皇甫碑歐率更書露立無恙但
右角稍夷泯似宜亭其上蓋隋碑至今絕少永興
所書經宋翻刻豈以其碑曰廟堂故覆之耶廟後
有碑院石刻林立中爲玄宗隸書孝經其後聖教
序四壁皆石經乃唐人所爲或疑歐率更者非是
其外歐陽通及僧建初所書碑文各一皆佳又有
隆闡法師碑無姓名亦佳餘唯顏魯公張旭懷素
而已有心經草書僞題右軍心經乃唐玄奘所譯
右軍安得先有此草或曰聖教序後亦有心經非
耶蓋彼乃集右軍行書爲之此草字畫牽連不斷
非集也明矣右丞輞川圖多剝落幾就磨滅其畫

竹尚存更有會昌年間刻禹迹圖李龍眠陽關圖
後有歸去圖已亡其半想亦龍眠筆徽宗竹雀一
褚河南聖教序在他所甚佳口宋陳堯佐知永興
軍時以太后遣宦者監浮圖前守姜遵盡毀古碑
碣克磚瓦之用堯佐奏曰唐賢臣墓石十亡有七
八矣子孫深刻大書欲傳之後世乃一旦與瓦礫
等誠可惜也其未毀者願勅所司完護之詔如其
言



